



**ATASSUT**

**UKA 2016/81**

**Siverth K. Heilmann**

**07. 10. 2016**

**Inatsisartut aalajangiiffigisassaattut siunnersuutigineqarpoq, Naalakkersuisut peqquneqassasut danskit oqartussa qarfiinut attaveqassasut Aalborg-imi Grønlandshavn-imiit Kalaallit Nunaannut umiarsuakkut nassiussassat tamarmik hash-itaqannginersut akitsuuserisunit misissorneqartarnissaat qulakkeerumallugu aalajangersimasumik Grønlandshavn-imi akitsuuserisoqartitsilersinnaanerup siunnerfigineqarnissaa.**

(Inatsisartunut ilaasortaq Steen Lyngé, Atassut)

ATASSUT-mit inatsisartunut ilaasortaaqatitta Steen Lyngé-p Aalborg-imi Grønlandshavn-imiit Kalaallit Nunaannut umiarsuakkut nassiussassat tamarmik hash-itaqannginersut akitsuuserisunit misissorneqartarnissaat qulakkeerumallugu danskit oqartussa qarfiinut attaveqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuusiamik saqqummiussineranut matumuuna qutsavigissara.

Nunatsinni aangajaarniutinik atornerluinerup annikigisassaangitsumik nunatsinni atugaanera unitsinniarneqartuartariaqartutut ATASSUT-mit isumaqarfigaarput, soorlu aamma tamanna siunnersuummi tunngavilersorneqartoq. Inuiaqatigiinni aangajaarniutit atugaaneri inunnut ataasiakkaanut, ilaqutariinnut aningaasaqarniarnermullu annertuunerit ajornartorsiutinik pilersitsisarpoq, taamaattumik ATASSUT-mit isumaqarpugut aangajaarniutinik atuinerup pakkersimaarneqarnissaa tamatigut pitsanngorsaavigineqartuartariaqartutut isigaarput.

Aangajaarniutinik atuneq/atornerluineq eqqarsaatigissagaanni inuiaqatigiittut inissisimavugut qajannartumi - innuttakittunnguuvugut sineriammilu siammasissumi najugaqartitserluta, taamaattumik aangajaarniutit sumiiffinnut avinngarusimasunut siammartinneqaraagata sumiiffinni akiorniarnissaanut iliuuseqarsinnaaneq killeqagaatsiartarpoq.

Taamaattumik nunatsinnut anngussiffiusinnaasut aqqudit nakkutiginnikkut sukateriffiqartariaqartut ATASSUT-mit isumaqarfigaarput.

Oqaluuserisap siuliani immikkoortoq 98-imi inunnik isumaginninnermi siunnersortit sulinermi atugarisaat pillugit, ilaatigut ATASSUT-mit tikkuarparput, ajornartorsiutit pilinnginnerini pinaveersaartitsineq pikkoriffiqartariaqarippat - taamaattumik ATASSUT-mit aalajangiusimavarput Naalakkersuisut peqquneqartariaqartut ilumut nakkutilliinerup sukateriffiqarnissaa pillugu danskit oqartussaqaarfiinut sulissuteqaarnertik uteriisaarutigisariaqaraat.

Nunatsinni aannajaarniutit ajornartorsiutit pisortat aningaasaqarnerannut annertuumik artukkarsuutaasinnaanera kisitsisinngorlugu ilisimaqqissaanngikkaluarlugu tikkuarsinnaavagut susassaqaarfinnut assigiinngitsunut attuisarneri, tassalu peqqinnissaqaarfinni, inunnik isumaginnittoqaarfinni, ulloq unnuarlu meeqqanut inuusuttunullu angerlarsimaffinni, atuarfinni, ilinniarfinni, timersoqatigiiffinni minnerunngitsumillu inunnut ataasiakkaani minnerunngitsumillu ilaqutariinnermi annikigisassanngitsumik sunnuteqaarnerluttarluni.

Taamaattumik ATASSUT-mit Naalakkersuisut qinnuigissavagut aningaasat maannakkoqqissaq annertugineqarsinnaangaluartut, ungasinnerusoq eqqarsaatigalugu pinaveersaartitsiniarnissaq inuiaqatigiittullu inissisimanitta qajannassusia eqqaamallugu iliuuseqaarfigineqarnissaanut aqqudissiuussinissaq sukannersumik sulissutigissagaat. Eqqaamallugu 57.000 tikinngilaarlugit nunarput innuttaqarpoq - aannajaarniutit siammarterneqaraluttuinnassappata siunissami inuit, ilaqutariillumi aannajaarniutit atuinerup kingunerisaannik ajornartorsiutit annertuumik inuiaqatigiinnut ajornartorsiortitsinerulersimasinnaapput.

Taamatut ATASSUT-mit oqaaseqarluta siunnersuut akuersaarlugu aappassaaneerinninnissaq sioqqullugu Inatsisartut ataatsimiitsitaliaannut susassaqaartumut ingerlateqqinneqarnissaa inassutigissavarput.

Qujanaq